

**IZDAVAČKA DJELATNOST
NACIONALNE I UNIVERZITETSKE
BIBLIOTEKE BOSNE I HERCEGOVINE
U 2003. GODINI**

Za Nacionalnu i univerzitetsku biblioteku Bosne i Hercegovine i njoj srodne ustanove kulture tokom proteklih nekoliko godina materijalna situacija je bila problematična. To se posebno nepovoljno odrazilo na izdavačku djelatnost ove biblioteke. Kako je i prijava na javni konkurs projekta (Izdavačka djelatnost NUBBiH) kod Fondacije za izdavaštvo / nakladništvo i prošle godine ostala bez očekivanog razumijevanja, NUB BiH je u 2003. godinu, kao i do sada, ušla bez ikakvih namjenskih sredstava za ovu djelatnost. I pored toga, dajući prednost svojim funkcijama, obavezama i potrebama svoje okoline i struke, NUBBiH je tokom 2003. godine štampala i pripremila za štampu 5 publikacija. Usprkos skromnom obimu, ovogodišnja izdavačka djelatnost Biblioteke po svom sadržaju zaslužuje svaku pažnju.

Funkciju nacionalnog bibliotečkog centra, sa zadatkom da registriira ukupnu izdavačku produkciju zemlje, NUBBiH predstavlja svojom edicijom **Bosanskohercegovačka bibliografija**. U 2003. godini, iako je pripremljeno 5 sveski, moguće je štampati samo jednu i to za monografske publikacije u 1999. godini. Ostale čekaju bolja vremena.

Edicija **Stručna bibliotečka literatura** zastupljena je sa dvije vrijedne publikacije iz oblasti bibliotečke pismenosti i zaštite bibliotečke građe. Namijenjene su kako studentima bibliotekarstva tako i bibliotečkim stručnjacima za njihovo permanentno obrazovanje i svakodnevni rad.

U okviru edicije **Memoria Bosniaca** štampan je ovaj časopis, br. 8 za 2003. godinu, posvećen temi "Obnova i buduća namjena Vijećnice".

Autori publikacija i priloga u ovim izdanjima su najkompetentniji stručnjaci zastupljenih oblasti iz naše zemlje i svijeta.

**Izdavačka djelatnost NUB BiH januar – juli
2003. godine:**

BOSANSKOHERCEGOVAČKA bibliografija monografskih publikacija : 1999. Niz A / pripremila Dženana Tuzlak. – Sarajevo : Nacionalna i univerzitetska biblioteka Bosne i Hercegovine, 2003. – (Edicija Bosanskohercegovačka bibliografija)

ISSN 1512-5165

BOSNIACA : časopis Nacionalne i univerzitetske biblioteke Bosne i Hercegovine / glavni i odgovorni urednik Enes Kujundžić. – God. 8, br. 8 (2003)

ISSN 1512-5033

OD slike do knjige : iz historije pisma, knjige, štampe i biblioteke / Emina Memija. – Sarajevo : Nacionalna i univerzitetska biblioteka Bosne i Hercegovine, 2003. – (Edicija Stručna bibliotečka literatura)

ISBN 9958-500-23-7 (NUBBiH)

REGIONES flumina Unnae et Sanae in veteribus tabulis geographicis = Unsko -sansko područje na starim geografskim kartama : (Izbor karata, planova i veduta u kontekstu historije Unsko – sanskog područja od kraja 15. do početka 18. stoljeća /Mithad Kozličić. – Sarajevo : Nacionalna i univerzitetska biblioteka BiH ; Bihać : Arhiv Unsko – sanskog kantona, 2003

ISBN 9958-500-22-1 (NUBBiH)

ZAŠTITA dokumentarnog naslijeđa : vodič za standarde, preporučenu praksu i priručnike o čuvanju dokumenata svih vrsta / urednik George Boston; Milton Keynes. – Sarajevo : Nacionalna i univerzitetska biblioteka Bosne i Hercegovine, 2003. – (Edicija Stručna bibliotečka literatura)

A. Rešidbegović



Memija Emina. Od slike do knjige : iz historije pisma, knjige, štampe i biblioteke. Sarajevo : Nacionalna i univerzitetska biblioteka Bosne i Hercegovine, 2003

Knjiga prof. dr. Emine Memije, koja nosi naslov "Od slike do knjige : iz historije pisma, knjige, štampe i biblioteke", tematizira problematiku iz

historije nastanka knjige, štampe i biblioteke, čiji su elementi, svakako, veoma čvrsto povezani. Ovaj tematski krug podudara se sa programom predmeta, koji autorica predaje na Filozofskom fakultetu u Sarajevu na Odsjeku za komparativnu književnost i bibliotekarstvo, pa ga možemo posmatrati i kao udžbenik kakvog do sada studenti nisu imali.

Ova izuzetno bogata i zanimljiva materija intenzivno interesira istraživače više od jednog stoljeća, ali su ipak mnoga pitanja do danas ostala otvorena. Objavljeno je mnoštvo knjiga, studija i drugih tekstova o pojedinim segmentima ove značajne teme, ali na bosanskom jeziku do sada nismo imali djelo koje obuhvata ovu oblast u cjelini.

Knjiga koju autorica nudi je upravo objedinjavanje ovih međusobno povezanih komponenata. Posebno je za nas značajno što je dr. Emina Memija stavila naglasak na objašnjenje ovih fenomena u Bosni i Hercegovini.

Za izradu ove knjige koristila je mnogobrojnu literaturu i vlastita istraživanja iz historije štampe na našim prostorima. Ako se svemu ovome doda dugogodišnje naučno i istraživačko iskustvo dr. Emine Memije i njeno zanimanje za ovu oblast, onda ne ostaje mjesta sumnji o tome da li treba ovu knjigu objaviti ili ne.

Knjiga je po svom sadržaju jednako zanimljiva za naučnika-istraživača i čitaoca zainteresiranog za ovu tematiku. A da ne govorimo koliko će koristiti studentima bibliotekarstva i, posebno, kao obavezna literatura kandidatima koji polažu stručni ispit iz bibliotekarstva.

Prof. dr. Lamija Hadžiosmanović

Mihaliček Mubera. Biblioteke i bibliotečko poslovanje : priručnik za stručnu organizaciju i vođenje biblioteke. Sarajevo : Nacionalna i univerzitetska biblioteka Bosne i Hercegovine, 2002

U cilju postizanja što boljih rezultata na polju permanentnog obrazovanja bibliotekara, Nacionalna i univerzitetska biblioteka Bosne i Hercegovine je u okviru svoje edicije "Stručna bibliotečka literatura" objavila još jedan priručnik za stručnu organizaciju i vođenje biblioteke pod naslovom Biblioteke i bibliotečko poslovanje.

Dugogodišnji nedostatak domaće stručne literature u području bibliotečkog poslovanja konačno je našao najbolje rješenje štampanjem ovog

priručnika koji nam je podarila dugogodišnji, istaknuti bibliotekar i bibliotečki savjetnik Mubera Mihaliček.

Vrijednost ovog priručnika je višestruka.

Prije svega, vrijednost priručnika leži u njegovoj originalnosti. Pored proučavanja i korištenja brojne literature, autorica nam prenosi i svoje vlastito, neprocjenjivo profesionalno iskustvo u segmentima poslovanja koji se ne mogu naći u nama dostupnoj stručnoj literaturi.

Naslovljena tema je razrađena prema slijedećim poglavljima, koja, iako predstavljaju zasebne cjeline, doprinose zaokruživanju razmatrane oblasti: Pojam i definicija biblioteke; Bibliotečka građa; Korisnici i korištenje biblioteke; Pročišćavanje fondova bibliotečke građe; Statistika o radu biblioteke. Tako su sve radne operacije, koje prate put knjige od njenog ulaska u biblioteku do korisnika i magacina, opisane do detalja, pružajući mogućnost početniku, ali i bibliotekaru sa iskustvom, da na najbolji način primijeni propisnu i najefikasniju bibliotečku tehnologiju.

Opremljenost priručnika, koja podrazumijeva potpuni istraživački aparat za snalaženje, povećavaju i dva važna priloga. To su Tumač stručnih izraza i skraćenica i Standardi i normativi za bibliotečku djelatnost.

Namjena priručnika je višeslojevita. Jednako dobro će doći onima koji se pripremaju za polaganje stručnih ispita, početnicima za snalaženje u moru stručnih poslova, kao i gotovim bibliotekarima na putu njihovog cjeloživotnog učenja.

Mr. Amra Rešidbegović

* *

